

TEZAU LITURGIC

4 OCTOMBRIE

SLUJBA

SOBORULUI

SF.KAZANULUI



MINEIUL PE OCTOMBRIE

MOSCOVA



Месяца октября в 4-й день
Всех святых,
в земли Казанстей просиявших
На малей вечерни

На Господи, возвах: **стихиры святых, глас 1.**

Подобен: Небесных чинов:

Взясте на рамо крест Христов/ и распястесь миру,
преподобнии,/ и последовасте стопам создавшего от не
сущих вся, Божия Слова./ Егоже молитесь, да приимем грехов
прощение/ и наследницы будем жизни вечныя.

Явистесь сокровище добродетелей/ и презресте вся, яже
в житии красная,/ Христовою любовью распалаемы,/
ищуще яже Богу угодная./ И Того ради бысте жители
Царства Небеснаго,/ темже о нас молитесь, да будем и мы
тому сопричастницы.

Безстрастия бывше **краснии** сосуди, **отцы**
преблаженнии/ и чудес источницы,/ монашествующих
столпи крепцыи, демонов прогонителие / и страстей
целителие./ Да почтутся песньми/ наставницы наши
премудрии/ и молят Христа, да спасет души наша.

Слава, глас 6:

Кто доволен похвалити таковыя святители,/ возсиявшия
напоследок лет,/ благодатию бо Святаго Духа/ чудес
исцелений дар приемше от Бога/ и своих телес нетление,/
нам же у Христа просят грехов прощения/ и велия милости.

И ныне, Богородичен, глас тойже:

Мати Божия Пречистая,/ образ Свой, яко дар пресвят
земли Казанстей давая/ и тем многия исповедники Сына и
Бога Твоего укрепившая,/ Заступнице Усердная, люди Твоя
не остави.

На стиховне стихиры, глас 2.

Подобен: ДOME Евфрафов:

Земле Русская,/ граде святой,/ украшай твой дом,/ в
немже Божественный/ велий сонм святых прослави.

Стих: Господи, Господь наш,/ яко чудно Имя Твое по
всей земли.

Земле Русская,/ красуйся и ликуй,/ се бо чада твоя/
Престолу Владычню/ во славе предстоят, радующеся.

Стих: Святым, иже суть на земли Его,/ удиви Господь
вся хотения Своя в них.

Соборе святых русских,/ полче Божественный,/
молитесь ко Господу/ о земнем отечестве вашем/ и о
почитающих вас любовию.

Слава, глас и подобен тойже:

Новый доме Евфрафов,/ уделе избранный,/ Русь
Святая,/ храни веру Православную,/ в нейже тебе
утверждение.

И ныне, Богородичен, глас тойже:

Аще и горение велие града Казани/ яви нам зрак лика
Твоего, Дево Пречистая,/ обаче Заступница Усердная земли
нашей явилася еси,/ Мати Божия, христиан похвало.

Тропарь святых, глас 4: Днесь, яко солнце пресветлое:
писан на велицей вечерни

На велицей вечерни

Блажен муж: 1-й антифон. На Господи, возвах: стихиры
святых на 8, глас 1:

Подобен: О, дивное чудо:

О, дивное чудо!/ Велие торжество явился земли нашей:/
собор святых прославляется/ и предстателие ко Христу сии
бывают./ Веселися, граде Казань,/ имея в себе лучи
сияющия, святых твоя./ Возопиим, вернии:/ радуйтесь,
заступницы наши,/ вы бо молитесь спастися верою вас
почитающим.

Твое славим торжество, святителю Гурие,/ свещами бо
златозарными град твой украшается/ и песнями духовными
днесь исполняется./ Радуются людие земли Казанския,/
воспевающе днесь собор святых своих/ и, светлопно

праздник совершающе,/ со архангелы и ангелы
ликовствуют:/ радуйтесь, заступницы наши,/ похвало и
утверждение,/ молитесь за ны, спаситися душам нашим.

Дивны Твоя тайны, Богородице,/ явилася еси,
Владычице, во граде нашем/ и образом Твоим радость
возсия нам./ Припадают Тебе ныне наши сродницы:/
святителие, преподобнии и праведнии,/ исповедницы и
мученицы./ Возвеселимся, вернии, днесь и воспоим:/
радуйся, Заступнице наша, христианом Похвало и
Утверждение,/ молися за ны, спаситися душам нашим.

Ины стихиры, глас 2.

Подобен: Киими похвальными:

Киими похвальными венцы/ восхвалим земли
Казанския первыя просветители/ предивныя Гурия,
Варсонофия и Германа,/ предстатели и заступники наша,/
семен спасительнаго учения сеятели равноапостольныя/
Христова Евангелиа путевожди истинныя?/ Ихже ради
прежде темный град озарися светом богопознания/ и
Христос прославися,/ имеяй велию милость.

Киими песненными словесы/ прославим святители и
мученики земли нашея,/ Ермогена, Патриарха земли
Русския,/ Кирилла, Анатолия, Иоасафа и Амвросия,/
исповедники веры Православныя,/ архиерейства жезлы

добрыя преизящныя,/ мучеников крепкия поборники,/ яко житием своим Христу угодиша,/ имеющему велию милость?

Киими похвальными венцы/ увязем мученики наша,/ Авраамия, Иоанна, Стефана и Петра,/ прежде просвещения града Казани первыя лучи,/ четверица мученическая преславная,/ Небеснаго Царствия добляя граждане,/ ихже в Своя обители Христос прият,/ имей велию милость?

Киими песненными добротами/ воспоим новомученики и исповедники наша,/ Димитрия, Филарета, Михаила и Павла,/ во священниках Христу потрудившиися,/ таже преподобномученики преславныя/ во обителях подвижавшиися?/ Благоуханныи суть цветы вертограда Небеснаго,/ ихже насади Христос Бог наш,/ имей велию милость.

Киими духовными песньми/ похвалим Гавриила и Александра,/ служители Господни изрядныя,/ монахом наставники и ангелом собеседники,/ во бранех духовных человеком поборники,/ града Казани светлая удобрения,/ Пастыреначальника Христа подражатели,/ подающего нам велию милость?

Слава, глас 8:

Да прославится днесь собор святых,/ в земли Казанстей Богу угодивших:/ славнии святителие и просветителие,/ такожде священномученицы и исповедницы,/ кровь свою за

Христа изливший,/ еще же преподобнии и праведнии,/ именованныи и именованныи,/ покровом Матере Божия, Заступницы Усердная/ в земли сей утверждения.

И ныне, Богородичен, глас 8: Царь Небесный:

Вход. Прокимен дне. И чтения три:

1.Пророчества Исаиина чтение (Гл. 43, ст. 9-14): Тако глаголет Господь: вси языцы собращася вкупе:

2.Премудрости Соломоновы чтение (Гл. 3, ст. 1-9): Праведных души в руце Божией, и не прикоснется их мука:

3.Премудрости Соломоновы чтение (Гл. 5 ст.15 – гл. 6, ст. 3): Праведницы во веки живут:

На литии стихиры, глас 2:

Припадем с любовью к преславному святителем Господним,/ Гурию, Варсонофию и Герману,/ первым просветителем земли Казанския,/ с нимиже воспоим пречуднаго Ермогена,/ святителя, исповедника и Патриарха Церкви Русския.

Помолимся усердно страстотерпцем Казанским,/ святым мучеником Авраамию, Иоанну, Стефану и Петру,/ Имя Христово дерзновенно исповедавшим,/ таже воспоим собор новомученик и исповедник,/ кровию своею землю оросивших / и заступники наши усердная явльшихся.

Воспоим и почудимся подвигом же, слезам и молитвам,/ яже Гавриил и Александр преславнии,/ с преподобными

отцы Зилантовыя и Раифския обители Богу принесоша,/ иже плод духовный в земли сей возрастиша.

Слава, глас 6:

Собор святых земли Казанския усердно взывает ко Господу,/ да сохранит Спас мира Христос народ православный,/ во всех концах вселенныя/ молитву о спасении приносящий.

И ныне, Богородичен, глас тойже:

Прославим, вернии, Обрадованную Богородицу,/ се бо во устех наших имамы всегда святое и благословенное имя Ея,/ непрестанно прибегающе к пречистей Ея и цельбоносней иконе:/ Тою бо обретаем, яже на земли вся благая и полезная,/ и от запинаний сущих на воздухе демонов избавляемся,/ яко Мати, рождающая всех Творца,/ спасает от бед души наша.

Молитвы на литии:

Спаси, Боже, люди Твоя и благослови достояние Твое, посети мир Твой милостию и щедротами, возвыси рог христиан православных и низпосли на ны милости Твоя богатая: молитвами Всепречистыя Владычицы наша Богородицы и Приснодевы Марии; силою Честного и Животворящего Креста; предстательства честных Небесных Сил безплотных; честного славного Пророка, Предтечи и Крестителя Иоанна; святых славных и всехвальных апостол;

иже во святых отец наших и вселенских великих учителей и святителей, Василия Великого, Григория Богослова и Иоанна Златоустаго; иже во святых отца нашего Николая, архиепископа Мир Ликийских, Чудотворца; святых равноапостольных Мефодия и Кирилла, учителей Словенских, святых равноапостольных великого князя Владимира и великия княгини Ольги; иже во святых отец наших, святителя Михаила, первого митрополита Киевского, первосвятителей Московских и всея Руси, Петра, Алексия, Ионы, Макария, Филиппа, Иова и Тихона; святых, в земли Казанстей просиявших:

Святителей Гурия, Варсонофия и Германа Казанских чудотворцев, Филарета, митрополита Киевского, святых священномучеников: Ермогена, Патриарха Московского и всея Руси чудотворца, Кирилла, митрополита Казанского, Анатолия, митрополита Одесского, Иоасафа, епископа Чистопольского, Амвросия, епископа Свияжского, Алексия, архиепископа Омского, Никиты, епископа Орехово-Зуевского; Димитрия и Филарета, пресвитеров Казанских, Михаила, пресвитера Чистопольского, Павла, пресвитера Елабужского и чад его: Бориса, Григория и Симеона; преподобных и богоносных отец наших: Макария Желтоводского, Свияжского чудотворца и Гавриила, старца Седмиезерного, святых преподобномучеников Зилантовых:

Сергия, Лаврентия, Серафима, Феодосия, Леонтия, Стефана, Георгия, Сергия, Илариона и Иоанна, преподобномучеников Раифских: Иосифа, Сергия, Антония, Варлаама, Иова и Петра, святых преподобномученицы Маргариты, игумении Мензелинской, преподобноисповедника Александра Седмиезерного, святых славных и добропобедных мучеников Авраамия Болгарского, Иоанна, Стефана и Петра Казанских; святых благоверных князей Феодора, Давида и Константина Ярославских чудотворцев, и всех прочих святых, в земли Казанстей просиявших, ихже и память ныне совершаем, святых праведных Богоотец Иоакима и Анны и всех святых, молим Тя, Многомилостиве Господи, услыши нас, грешных, молящихся Тебе, и помилуй нас.

Владыко Многомилостиве, Господи, Иисусе Христе, Боже наш, молитвами Всепречистая Владычицы нашей Богородицы и Приснодевы Марии, силою Честного и Животворящего Креста, предстательства честных Небесных Сил безплотных, честного славного Пророка, Предтечи и Крестителя Иоанна, святых славных и всехвальных апостол, святых славных и добропобедных мучеников, преподобных и богоносных отец наших и всех святых, в земли Казанстей просиявших, ихже и память ныне совершаем, святых праведных Богоотец Иоакима и Анны и всех святых Твоих, благоприятну сотвори молитву нашу, даруй нам оставление

прегрешений наших, покрый нас кровом крилу Твоею, отжени от нас всякого врага и супостата, умири нашу жизнь, Господи, помилуй нас и мир Твой, и спаси души наша, яко Благ и Человеколюбец.

На стиховне стихиры, глас 5.

Подобен: Радуйся:

Радуйтесь, древнии святителие,/ святии сродницы наши,/ цветы духовнии земли Казанския,/ похвало наша и утверждение,/ тихое пристанище,/ сокровище церковное,/ стопы и словеса апостольская,/ жития бо ваша и многая чудеса/ прославляют прославльшаго вас Господа,/ Егоже прилежно молитесь/ даровати душам нашим велию милость.

Стих: Честна пред Господом/ смерть преподобных Его.

Радуйтесь, светильницы многосветлии,/ священномученицы архипастыри и пастыри наша,/ врачеве духовнии,/ недугующим отрада и скорбящим утешение,/ обуреваемым пристанище немятежное,/ столпи церковнии, верных утверждение,/ за ны Христа Бога молитесь,/ даровати нам велию милость.

Стих: Блажен муж, бояйся Господа,/ в заповедех Его восхощет зело.

Радуйтесь, отцы преподобнии,/ заступницы наши и хранителие,/ Духа Святаго сосуди избранныи,/ земли Казанския утверждение,/ благочестия столпи

непоколебимии,/ правило веры и образ благочестия./
 Радуйтесь, новии исповедницы и мученицы,/ кровьми
 своими землю нашу озарившии/ и подвиги велиими обители
 освятившии./ Темже священную вашу память
 совершающим/ Христа Бога молите/ даровати велию
 милость.

Слава, глас 6:

Иже прежде темный,/ ныне же просвещенный град
 Казань радуется,/ имея в себе святые заступники своя,/
 лучезарные молнии Господни,/ имиже агарянская лесь
 разрушися,/ сей край земли Русския просветися/ и мнози
 святии Господни явишася,/ славу Церкви Христовы
 возвещающе.

И ныне, Богородичен, глас тойже:

Да радуется обитель Твоя, Богородице,/ водное естество
 семи езер да ликовствует днесь,/ яко Твоего, Чистая,
 честного образа пришествием град наш спасается,/ раби
 Твои болезней исцеление приемлют/ и к Тебе, Чистая,
 взывают:/ радуйся, врачество наше неоскудное,/ горьких
 недугов избавляющее;/ радуйся, скорбящим Божественное
 веселие,/ и Живоносный Источниче святыни;/ радуйся,
 многосветлая Звезда,/ иконою Твоею нас озаряющая;/
 радуйся, основание Кизическия обители,/ Тобою бо,
 Всечистая, хвалимся и к Тебе в нуждах прибегаем.

На благословении хлебов тропарь святых, глас 4:

Днесь светло красуется земля Казанская,/ в ней бо память собора святых ея совершается/ и Церковь псалмы и песнями духовными украшается,/ прославляющи святители и благовестники своя,/ мученики, исповедники и чудотворцы,/ преподобныя мужи и жены,/ праведныя и вся святые,/ иже купно с Богородицею Престолу Божию предстоят/ и молятся спастися людям страны нашея.

Вместо Богородице Дево: поем тропарь сей единойжды:

Заступнице усердная,/ Мати Господа Вышняго,/ за всех молиши Сына Твоего, Христа Бога нашего,/ и всем твориши спастися/ в державный Твой покров прибегающим./ Всех нас заступи, о Госпоже Царице и Владычице,/ иже в напастех и в скорбех, и в болезнях, обремененных грехи многими,/ предстоящих и молящихся Тебе умиленною душою и сокрушенным сердцем,/ пред пречистым Твоим образом со слезами/ и невозвратно надежду имущих на Тя,/ избавления всех зол,/ всем полезная даруй/ и вся спаси, Богородице Дево:/ Ты бо еси Божественный Покров рабом Твоим.

На утрени

На Бог Господь: тропарь святых, глас 4: Днесь яко солнце пресветлое: дважды. Слава и ныне: Заступнице усердная:

По 1-м стихословии седален, глас 3:

Днесь Церкви Русския торжество и града нашего веселие, се бо паства Казанская святыми своими, яко златом нетленным, хвалится и памятию их благоухает. Тии бо, во славе Царствия Небеснаго пребывающе, молят Всемилостиваго Бога, да подаст мирови велию милость.

Слава, глас 5:

Яко солнце светозарное, возсия днесь память твоя, святителю и исповедниче Кирилле, лучами озаряющи верных сердца, к прославлению дивнаго во святых Своих Бога, даровавшего тебе крепость во исповедании и терпение в скорбех. Не премолчи о нас, угодниче Христов, и избави нас от всякаго зла, Церковь Русскую от раскола и нестроения сохрани, мир мирови испроси и душам нашим велию милость.

И ныне, Богородичен, глас 4:

Днесь светло красуется Раифская пустынь, яко зарю солнечную, от востока возсиявшую, восприимши, Владычице, чудотворную Твою икону, еюже разгоняеши мглу искушений и бед от вопиющих верно: избави обитель

нашу и вся страны христианския от всех навет вражиих и спаси души наша, яко Милосердная Заступница рода христианскаго.

По 2-м стихословии седален, глас 1:

Приидите, вси вернии, святителя Ермогена восхвалим, звезду, от града нашего возсиявшую, всю землю Русскую озарившую и ныне в помощь Церкви и Отечеству во утверждение веры отцев наших явленную: Господи, молитвами святителя, мир Твой подаждь нам и велию милость.

Слава, глас 5:

Иоасафе, священномучениче Христов, твердый и мужественный исповедниче, святителя Кирилла сподвижниче, земли Казанския похвало, пастырю добрый, положивый душу за паству твою, моли Христа Бога, яко да милостив нам будет в День Судный.

И ныне, Богородичен, глас тойже:

Кий дар принесем Ти, Пречистая? Кия достодолжныя песни воспоим пред святыми Твоими иконами, Заступнице наша и Мати Всеблаженная? Аще и град Твой не оставляеши, егда нечестивии людие, образ Твой не почитше, расхитиша обитель Твою и лика Твоего цела не оставиша, тогда не токмо люди града нашего, но вся христианы восплакаша и возрыдаша. Ты же чрез святителя

Константиня града утешение дарова нам, новое торжество нам являющи, мы же, любовию чтуще честную икону Твою, Тебе песнословим вси поюще: радуйся, Дево Честная, Всеблаженная.

Величание:

Величаем вас,/ вси святии, в земли нашей просиявшии,/ и чтим святую память вашу,/ вы бо молите за нас/ Христа Бога нашего.

Псалом избранный:

Вси языцы воспещите руками, воскликните Богу гласом радования.

Князи людстии собращася с Богом Авраамлим, яко Божии державнии земли зело вознесошася.

Велий Господь, и хвален зело, во граде Бога нашего, в горе святей Его.

Речная устремления веселят град Божий, освятил есть селение Свое Вышний.

По полиелее седален, глас 5:

Красуйся, светися, земле Казанская, яко имаши в себе святые твоя, иже основание твердое веры Православных, камень краеугольный и луч светлый Евангелиа Божественнаго быша, ихже любовию почитаем.

Слава, глас 6:

Иже прежде лжеверием помраченный, ныне же верою во Христа просвещенный, преславный град Казань вами хвалится, имея в себе мощи ваша нетленные, Гурие, Германе и Варсонофие, отцы наши преподобнии, вы бо с верою приходящим источаете чудеса и подаете неоскудно исцеления, любовьию святую вашу память почитающим.

И ныне, Богородичен, глас 8:

Приидите, возрадуемся Державней Заступнице рода нашего, Царице Богородице. Приидите, к тихому Ея и чудному, почитаемому ангелы, честному поклонимся образу, дарует бо верным обильныя дары целебныя, от неистощимаго источника святых иконы неоскудную благодать источающи; тьмы избавляет нас искушений и бед, и всякаго греха, благочестно и богоприятно прославляющих и чтущих светлую и чудную Богоматере святую икону. Тем, воспевающе, воззовем Первообразней: радуйся, любезная миру помощи, во спасение душ наших.

Степенна, 1-й антифон 4-го гласа. Прокимен, глас 4:

Радуйтесь, праведнии, о Господе,/ правым подобает похвала. **Стих:** Буди, Господи, милость Твоя на нас, якоже уповахом на Тя. **Всякое дыхание: Евангелие от Матфея, зачало 10.**

По 50-м псалме стихира, глас 6:

Соберемся, людие,/ милостивое смотрение Божие
 возславить,/ изволи бо Господь наш землю Казанскую
 просветить;/ темже подвижники Христовы прославим:/
 святители чудныя,/ мученики древняя,/ таже новомученики
 и исповедники преславныя,/ преподобныя, и праведныя, и
 вся святыя,/ край сей благодатною силою освятившия/ и
 помощь Господа и Спасителя нам стяжавшия.

Канон, глас 5.

Песнь 1

Ирмос: *Величаваго фараона в мори потопивша/ со
 оружием и всадники,/ Израиля же преславно спасша и по
 суху проводша,/ поем Христа, яко прославися.*

Припев: *Вси святии земли нашея, молитесь Бога о нас.*

Песньми благовосхвалити хотящих память вашу,
 блаженнии сродницы наши, светоносную нам зарю, святии,
 с Небесе низпослите.

Святии вси, иже землю Казанскую прежде ея
 просвещения именем Христовым освятившии, святителие
 Христовы и исповедницы, ихже достойно исчислити не
 можем, молитву вашу сотворите о братьях ваших, молим вы.

Величие наше и похвала ты еси, Гурие первый
 архипастырю наш: тобою бо многия неверныя ко Христу
 обратишася. Ныне молися за люди, ихже привел еси Богу, да
 воспоем Его, яко прославися.

Первый сеятель добродетелей духовных и первый пастырь, и Церкви начальник, первый архиерей и учитель закону Божию в новопросвещенном граде Казани явился еси, Гурие равноапостольне.

Храм первопрестолен Богородичен явился во граде нашем труды твоими, Гурие, Благовещению Пречистыя посвящен, идеже мощи твоя положены суть и доныне чудеса источают.

Песньми и пении духовными восхвалим святителя Гурия и, припадающе к честней и многоцелебней раце его, с любовию облобызаем ю и сице воспоим: радуйся, молитвенниче о граде твоём неусыпный.

Богородичен: Во храм Благовещения сошедшеся, егоже божественный Гурий устрои нам иногда, безсеменное Рождество от Девы Чистыя со Архангелом воспоим: радуйся Благодатная, Господь с Тобою.

Песнь 3

Ирмос: *Державною рукою и сильным словом/ Небо и землю сотворил еси,/ юже Твоею Кровию искупил еси, Церковь Твою,/ яже о Тебе утверждается, зовущи:/ яко несть свят, разве Тебе, Господи.*

Державною рукою и мудрыми словесы учил еси, преславный Варсонофие, первый просветителю града Казани, якоже монах предивный по избытии плена

агарянского явился еси, таже отец иноков соделался еси, моли спастися душам нашим.

Из плена агарянского изшедый, державною рукою и мудрыми словесы управил еси стадо твое, преславный Варсонофие, первый просветителю града Казани.

Святителю Варсонофие, ты первоначальник жития монашеского во граде Казани явился еси и, красну обитель Спасова Преображения воздвигнув, подвиги твоими чадом духовным образ благочестия подал еси.

Край Казанский солию учения Христова осолил еси, святителю Германе, таже, во граде Свияжске обитель Богоматери создав, добр учитель явился еси.

Престол Казанский по святем Гурии наследовав, добр пастырь людем новым явился еси, Германе премудре, таже, храмы Божия в земли Казанстей умножив, на высшее служение восхищен был еси.

Радуйся, святителю Филарете, ты бо не токмо в Киеве граде, но и zde мног плод принесл еси, просветителю языков, устроителю храмов, алчущих питателю, первосвятителей Казанских ревностный почитателю и к Богу за люди молитвенниче.

О, троице равноапостольная всечестная, древнии наши учителя и первии архипастырие, Гурие, Варсонофие и

Германе со святителем Филаретом и всеми святыми земли нашей, молитесь, во еже спастись душам нашим.

Богородичен: Пречистая Твоя икона, Богородице Дево, врачевство всему миру духовное, к нейже прибегающе, Тебе покланяемся и, исцелений благодать почерпающе от нея, недугов телесных и душевных страстей Твоими молитвами освобождаемся.

Седален, глас 8:

Приидите, казанстии людие, принесите ныне пение и моление своему первосвятителю и воспойте ему красное от души хваление: той бо начаток бысть проповеди божественныя агаряном, просветитель во тьме сидящим, заблуждшим наставник и руководитель ко спасению, многия привел ко Христу Богу, Емуже аще и выну на Небесех предстоит, обаче и земная посещает, и на праздник свой от Горних низходит, и возвеселяет собранныя люди своя, зрит покланяющихся святому образу Его и слышит молитвы молящихся и приносит я ко Владыце. Единогласно убо воззовем к нему: о великий отче наш, святителю Гурие, никогдаже остави нас, чадо твоих, но посещай всегда милостию своею и молитвами твоими соблюдай.

Слава, глас 6:

Ни святитель быв, ни мученик земли нашей, ни пророк, ниже апостол, обаче храмы наша именем твоим хвалятся,

святые праведне Иоанне, пастырю Кронштадтский. Ты бо стопы своими, освящая волжский путь и словесных овец научая, до града нашего достигл еси, цевнице духовная, проповедниче покаяния, служителю Божественных Таин благоговейный.

И ныне, Богородичен, глас тойже:

Людие благочестивии, правовернии собори христоименитии, приступите верно вси, божественному припадающе Божия Матере образу: Та бо исцеление болящим радостно подает, уязвляет же злославныя, яко стрела от лука, нас всех веселит световидно и покрывает молитвами Своими.

Песнь 4

Ирмос: *Духом Божиим очищся пророк,/ дышающим в нем,/ Аввакум Божественный, бояся, глаголаше:/ внегда приблизятся лета, познан будеши, Боже,/ на спасение человеков.*

Дух Божий, яко на пророцех древле, почи на тебе, святителю Ермогене досточудне, первоиерарше Церкви Русския, ты бо первый положил еси теплыя молитвы и слезы, яко залог спасения ея и всего Отечества, егда брань тяжкая постиже землю нашу.

Икону Пресвятыя Богородицы, Заступницы Усердныя, на длани твоя приял еси, святителю Ермогене преславне, и

первое пение молебное пред нею сотворил еси, темже ты убожаем.

Сигор ли гору наречем ты, святе Ермогене? Тобою бо земля Русская от неправд и беззаконий и многих нестроений спасется, темже и ныне буди о нас теплый молитвенник пред Богом, достойный возглавителю собора святых Казанских.

Патриарха Тихона споспешник, Петра крепчайшаго сострадатель и звезда путеводная Церкви Русстей явился еси, Кирилле святителю, с ними ныне Небесныя славы наслаждаешься, Христов мучениче добropобедный.

Страдания многая претерпел еси, отче Кирилле, клеветы, суды, заточения, предательства лжебратий и угрозы смертныя, такожде насильства и нападения врагов Церкви Христовы, новомучениче земли Русския.

Твое крестоносное в вере стояние от смуты и раскола Церковь Русскую сохранило есть, преславне Кирилле, имя твое бысть образ победы духовныя, юже соверши единство святых мученик. Темже хвалится тобою земля Казанская, священномучениче досточудне.

Богородичен: С чинми ангел, со пророки, апостолы и со всеми святыми за ны, грешныя, Богу помолися, Владычице, Твоего Покрова праздник в Церкви Русстей почитающия.

Песнь 5

Ирмос: Слово Божие Всесильное,/ мир всему миру послы/ и светом истинным освещая и просвещая вся,/ из нощи Тя славящия.

Добрый учитель вертограда духовного града Казани, верный возвеститель пути спасительного, истинный хранитель апостольских преданий, столп непоколебимый и страдалец за Христа явился еси, священномучениче Анатолие предивне.

Никтоже возможе разлучити тя от любви Божия, славный Иоасафе, егда же Господь в годину лютую гонений на Церковь Русскую призва тя к служению святительскому, мужественный защититель паствы твоя был еси.

Иоасафе предивный, Чистопольская похвало и адаманте Церкви Русския, преемниче Анатолия славного и споспешниче Кирилла богомудраго, ты ныне с ними в чертозах Небесных Богу предстоиши и молитвенник о пастве твоей являешься.

Возславим обитель Свияжскую, идеже подвигом добрым святитель Амвросий подвизася, и, честную его икону обстояще, воззовем: радуйся, страдальче неодоленный; радуйся, обители твоей щит и ограждение; радуйся, небесный сродниче наш.

Кто воспоеет подвиги твоя, Амвросие отче наш? Наставник бо добрый явлься, апостол и учитель в земли Корейстей был еси, и земля Казанская тобою хвалится, светильниче Елабужский и Сарапульская славо, юже и ныне молитвенным покровом ограждаеши.

Многия святыя израсти земля наша и теплыя предстатели ко Христу дарова, с сими прославим святителей и мучеников единокровных Алексия и Никиту, Бугульминских архипастырей славных.

Богородичен: Во обителях древних земли наша монаси пения Тебе приносят, Пренепорочная Мати, во Успении бо Твоем чтущия Тя и Сына Твоего не оставляеши.

Песнь 6

Ирмос: *В Церковь Небесную Святую Твою да приидет молитва моя,/ вопию Ти, яко Иона, из глубины сердца морского пучины морския:/ от грех моих возведи мя,/ молюся Тебе, Господи.*

Кия песни принесем священномучеником нашим во пресвитерством чине Богу послужившим, иже страдания мужественно претерпеша и венцы Небесныя стяжаша? Темже любовию память их светло празднуем.

Небоязненно веру Православную исповедал еси, священне Димитрие, и, не устранившись сильных мира сего, за правду Божию даже до крове пострадал еси.

Служитель неленостный и пастырь добрый явился еси, отче Филарете, в вертограде духовнем служа и овцы словесныя окормляя, темже и тяжкая темничная страдания Христа ради претерпети изволил еси.

Пастырское служение в Чистопольских пределах добре совершая и ревностию о Бозе распалаяся, чада твоя духовная небаязненно исповедати веру во Святую Троицу призывал еси, таже и смерть мужественне сретил еси, отче Михаиле.

Душегубцы безбожнии кровь твою пролиша, Павле, отче наш, ты же, древним мучеником подобяся, за Христа достойно смерть приял еси и со чады твоими мученического венца удостоился еси, Елабужская красото.

В пределах Марийских новомученицы явистесь, пастырие и усерднии к Богу молитвенницы, Адриане и Михаиле честнии, сего ради и за веру Христову убиение прияли есте.

Богородичен: Сын убо Твой, Всечистая, нерукотворенное изображение Божественного лика Своего верным дарова, Ты же, Дево Всеблаженная, миру честную Твою икону оставила еси.

Кондак, глас 3:

Подобен: Дева днесь:

Днесь лик святых земли нашея предстоит Престолу Божию/ и усердно молит Спаса нашего Бога и Заступницу Усердную:/ святителие и преподобнии покланяются,/ мученицы со исповедники ликуют,/ нас бо ради молят сродники наши,/ еже спастися нам.

Икос:

Приидите, вернии, почудимся подвигом святых земли нашея; приидите, воспоим суция сродники, иже во граде нашем, яко светлая лучи, житием своим паче луч солнечных сияюще, явишася и лик святых многих и Богу угодивших подвижник составиша, в нем бо святителие древнии и многопетии, священномученицы во святительстве и пресвитерством чине послужившии, преподобнии отцы, нам мудрии наставники показавшиися, мученицы древнии и новии, венцев Небесных сподобившиися. Нас бо ради молят сродники наши, еже спастися нам.

Песнь 7

Ирмос: Пламень пещный поработиша благочестивии отроцы,/ тем свыше ороси я, готовы палимы по естеству,/ но паче естества мужески пояху:/ благословен еси, Господи,/ на Престоле Славы Царствия Твоего.

Отцы преподобныя земли нашея восхвалим днесь, яко угодники Божия и теплыя наша молитвенники, иже, тесным путем шествовавшие, духовнаго велиара победиша и многия иноки возрастиша.

Пророчески прорека еси, преподобне Макарие: свету евангельскому подобает приити на землю нашу и во многих святых возсияти. Темже и ныне благословением твоим пустынь Свияжская хвалится.

От юности любовью Христовою просветився, суетный и многомятежный мир оставил еси, богомудре Гаврииле, и, предстательству Пречистыя Богородицы житие твое вверяя, пред пречистым Ея образом слез потоки изливал еси и теченьми их седьмь озер освятил еси, старче наш.

Измлада Духом Святым наставляемъ, в Седмиезерную пустынь вселился еси, преподобне отче Гаврииле, отонудуже многия наставляя, мудрый наставник монахов и чадолюбивый отец всем явился еси.

Чадо Господне возлюбленное, чудная Елисавето преподобномученице, собеседника мудра, старца Гавриила, имущи и ревностне советам того внимающи, духовною добротою украсилася еси.

Христу последовав и славу земную презрев, преподобне отче Александре, во обитель Седмиезерную вселился еси,

идеже премудростию Божию напитава, исповедник земли нашей явился еси.

Богородичен: Не имамы языка, во еже изрещи вся благодеяния Твоя, Богородительнице, от всяких бо скорбей, бед и болезней свободждаемся, иконою Твоею укрепляеми, еюже и обитель Седмиезерная украшается.

Песнь 8

Ирмос: *Крепцыи отроцы трие суще,/ силою оболкшися Святыя Троицы,/ уловиша и победиша халдеи,/ и дивно изменися естество:/ како огонь в росу прелагашеся?/ Без туги я сохрани, яко пеленами,/ о пролиавый мудрость на всех делах Твоих, Боже,/ Тя превозносим во веки.*

Преподобномученицы Зилантовы, Пастыреначальнику Христу последующе, веру истинную, яко щит, сохранили есте и, усердно ближним послуживше, даже до крове пострадали есте.

Вашу память достодолжно почитаем, Сергие, Лаврентие, Серафиме, Феодосие и Леонтие, Стефане, Георгие, Сергие, Иларионе и Иоанне, преподобномученицы святии, монаси Успенския обители славныя.

Адаманти избранныи Богом от земли Казанския явистеся, преподобномученицы Иосифе, Антоние и Сергие, Варлааме, Иове и Петре Раифстии, яко воины Христови добропобеднии.

Молитвами вашими обители земныя не оставляете, преподобномученицы наши, мученичества кровью и постничества трудами венчаемы. Темже и покажетесь мучеников и преподобных единовсельницы.

Яко цветник духовный обитель Богородицкую соделали есте, отцы Раифстии, ныне же, предстояще Престолу Божию, не престайте о нас молиться.

Христа, яко Небеснаго Жениха, возлюбивши, вся красная мира сего оставила еси и ангельскому житию поревновала еси, Маргарито всехвальная, и, обитель твою земную украшаючи, о горней помышляла еси, Мензелинская свеще возженная.

Троицен: О, Троице Честная, прими, яко фимиам избранный, подвиги и страдания всех святых, в земли Казанстей просиявших и Тебе усердно послуживших, ведомых и неведомых, и молитвами их Церковь Русскую и Отечество наше от всякаго вреда сохрани.

Богородичен: Тебе, Избранней от всех родов, Божией Матери, благодарственная пения приносим и, пришествием честныя Твоя иконы озаряемы, с любовью зовем: радуйся, Невесто Невестная.

Песнь 9

Ирмос: *Из Едема изыде род наш прабабы ради Евы,/ призван же Тобою, рождшею нам новаго Адама — Христа,/*

во двою естеству, Дево Чистая./ Взыграся Адам прадед,/ яко избыв первыя клятвы,/ мы же, Тобою хвалящися,/ яко Тебе ради Бога познахом,/ и Тебе величаем.

Приидите, мучениколюбцы вси, духовно возвеселимся и торжествуем! Днесъ бо предлагают трапезу тайную мученицы земли нашея, веселящую нас, празднолюбцев, еже вопити к ним: радуйтесь страсготерпцы непобедимии.

Днесъ, благовернии людие, сошедшися, восхвалим добляго мученика и страдальца Авраамия, той бо, силою Божиею укрепляемъ, душу свою за Христа положи и от булгар зловерных много пострада. Сего ради, от Господа венец приим, молитвенник теплый о душах наших явился еси.

Страсготерпче святой Иоанне, блаженна земля Казанская, напитавшаяся кровию твоею, ты бо, Христа со дерзновением проповедавав, многия муки от неверных агарян приял еси и, страданьми твоими противных дерзости низложив, Святыя Троицы поборник явился еси.

Отца и Сына и Святаго Духа исповедал еси, святе Петре, агарянское нечестивое учение отменяя твердо, темже и смерть приял еси, и во обители Небесныя вселился еси.

Агарянская отрасль был еси, Стефане, но, неверие тех отринув, Христу прилепился еси. Таже молитвами пресвитера Тимофеа исцеление получил еси и, святое

крещение вскоре приим, доблий страстотерпец земли нашея явился еси.

О, велиции сродницы наши, Небеснаго Сиона достигшии и велию славу от Бога приимшии! Испросите нам, в скорби сущим, утешение, страну нашу во благочестии утвердите и люди расточенныя соберите, песнь благодарения, яко дар, приемлюще.

Богородичен: Юже поют вси земнороднии и славословят вся силы Небесныя, от всех верно поклоняемую, Заступницу Усердную рода христианскаго, и мы, благодаряще, прославим.

Светилен:

Новомученицы и исповедницы земли Казанския, молитесь о нас Владычицу Богородицу, да и мы, скорби и искушения побеждающе, веру Православную, вся концы просвещающую, сохраним, во вся дни живота нашего.

Слава:

Вкупе со святыми земли нашея хвалу вам воздаем, святити Феодоре, Давиде и Константине Ярославстии чудотворцы, вы бо страну Казанскую попечением при жизни не оставили есте, тако и ныне, молим вас, к свету Христову руководите нас.

И ныне, Богородичен:

Светоносная Слова Палато, Ковчеже, позлащенный Духом, явилася еси, Пресвятая Дево, великия чистоты ради. Темже вкупе со святыми сродники нашими взываем к Тебе: молися, Владычице, о нас, грешных, да от страстей очистимся и просветимся светом Сына Твоего.

На хвалитех стихиры 4, глас 8.

Подобен: О, преславного чудесе:

О, преславного чудесе!/ Днесь ликует земля Казанская,/ память святых своих празднующи,/ иже духовная дарования источают обильно./ Темже с любовью к ним возопиим:/ о, теплии молитвенницы наши ко Господу,/ испросите нам прощение согрешений/ и, яко звезды пресветлыя,/ путеводите ны к Царствию Небесному.

О, преславного чудесе!/ Днесь ликует земля Казанская,/ прославляющи святители и священномученики,/ иже в житии израстиша красный плод благочестия/ и, яко ваиа благоуханная процветше,/ любовь евангельскую нам явиша./ Тех молитвами, Христе Боже,/ не отвержи нас от лица Твоего/ и даруй нам мир и велию милость.

О, преславного чудесе!/ По тридесяти и двою летех нетленные мощи обретошася/ первого просветителя Казанскаго,/ святителя Гурия богомудраго,/ благоуханием вся исполняюще./ О, каково дарование новому чудотворцу дадеся!/ Той бо и ныне со всеми святыми земли нашея,/ во

обителех Небесных пребывая,/ молит Христа Бога спастися душам нашим.

О, преславного чудесе!/ Днесь ликует земля Казанская,/ благодатию новомученик и исповедник своих красующися,/ иже души и телеса многонедужныя врачуют./ Темже и мы, духовно радуящися,/ Господа, Дивнаго во святых Своих, прославляем/ и, на предстательство всех святых земли нашея надеящися,/ с любовью и упованием к ним взываем:/ Христа Бога молите, даровати нам велию милость.

Слава, глас тойже:

Приидите, вси духовне возвеселимся/ в памяти святых земли нашея/ и во гласе радования возопиим, глаголюще:/ радуйтесь, святителие богомудрии,/ Евангелие Христово граду нашему проповедавшии./ Радуйтесь, мученицы добропобеднии,/ веру даже до смерти исповедавшии,/ мук томления претерпевшии/ и в годину лютую совершенно страдания венец приемшии./ Радуйтесь, преподобномученицы достохвальнии,/ телеса своя пощением истаявшии/ и, страсти плотския умертвивше,/ страданиями и муками Бога прославившии./ Но о, святителие, мученицы вкупе с постницы и праведницы,/ вас Венчавшаго прилежно молите,/ избавитися нам от враг видимых и

невидимых,/ верою и любовью совершающим честную память вашу.

И ныне, Богородичен, глас тойже:

О, преславного чудесе!/ Небесе и земли Царица,/ от святых сродников наших умоляемая,/ до ныне землю Русскую покрывает/ и лика Своего изображении милостивно обогащает./ **О, Владычице Державная!** Не престани и на будущее время/ во утверждение на Руси Православия/ милости и чудеса изливати до века. Аминь.

Славословие великое. Ектении и отпуст.

На Литургии

Блаженна от канона песни 3-я и 6-я. Прокимен, глас 7: Восхвалятся преподобнии во славе/ и возрадуются на ложах своих. **Стих:** Воспойте Господеву песнь нову, хваление Его в Церкви преподобных. **Апостол ко Евреям, зачало 334. Аллилуиа, глас 2:** Священницы Твои облекутся в правду, и преподобнии Твои возрадуются. **Стих:** Бог прославляемъ в совете святых. **Евангелие от Иоанна, зачало 51. Причастен:** Радуйтесь, праведнии, о Господе, правым подобает похвала.

[Текст службы утвержден на заседании Священного Синода 23-24 сентября 2021 года (журнал № 67).]